

Balua na bhisi  
 gba Polo pi omabhuka na gudhu na  
 Tesalonike  
 Eli na kalanu

Li nadjɛ lio de-e pɪndji nago gba Kilisito adu lie agbe tolo bhú Dadjua gba Ebhe na Tesalonike-e, Polo atsia aye balua na bhisi gba e inde-e pɪndji nabhuka inde me ekpí nago gba ngámá-a akolo. Aní atsia apa me a mo-o ade, do aní de-e, kala nago ka Kilisito-o, engú nasisiti di ne bhe nato mbolo li okpála-a, inde ayíe ka kpála na tsulutsulu u a'i me «Bhulu yala» adú naali ané mane (2:3). Kpála ang-o adú nagnu Kilisito.

Polo ngapa pi okpála i ngatanga balua inde-e me, u lu bha kpekpeke bhú nabhuka, abana okpekpeke da 'ngú ne olíkabhu du bha pi-ie, u du bha namene kulu ngubula nasia mukobho maka li Polo ne obi e ngamemene lie-o, amba u du ne 'ndjá bua ne namene bádha 'ngú.

Ongbengbe ongú inde bhú bhuku inde-e ngae inde:

Eli na kalanu 1:1-2

Natoko ne nadhogö 1:3-12

Líli pɪndji nago gba Kilisito 2:1-17

Engú inde a ayo ngubula mukobho gba makilisito 3:1-15

Eli na soso 3:16-18

*Polo ne obi* e yi omabhuka na gudhu na Tesalonike mayi

<sup>1</sup> Ngayi omabhuka na Dadjua gba 'Dyi ní Ebhe di ne Ngámá gba ní Yesu Kilisito na gudhu na Tesalonike-e, ya yi yi mayi. Ma aye balua inde-e ngama Polo, bhú dabili

bini ne Silivano di ne Timoté. <sup>2</sup> A ayo me bádha bhú 'bu ne guo 'ngú gba 'Dyi ní Ebhe di ne Ngámá gba ní Yesu Kilisito-o du ne yi bhú dabilì bini.

*Polo agie heni pi* Ebhe, anì atsia ato masi bhú omabhuka

<sup>3</sup> A ayo me ya gie heni pi Ebhe ndu 'kpí hana ngubula yi ondaise ya. A la bhadi ndjindji me ya mene moko, anga nabhuka gba yi-e nganu ne kalanu naali. La di-e, mukunda li ndu yi hana nde ne e sunda yi-e nganu ne kalanu. <sup>4</sup> Kaka-a, ya ngapa 'ngú gba yi-e ne gindaginda bhú oDadjua gba Ebhe kabula kekele di ne nabhuka gba yi, abana u ngato mbolo li yi lie di ne yi ngazu likabhu lie ne ndu kpadji hana-o.

<sup>5</sup> Bhobhomu-o ngasuno me Ebhe ngakodho 'ngú ngbingbili. Padhá de, anga ka olikabhu inde yi ngazu e-e, Ebhe aú me yi ati ne nali bhú Nau gba ni inde yi ngazu likabhu ngú e ko. <sup>6</sup> Li Ebhe nde lie ne ngbili kpála-a , anì agie olikabhu pi okpála inde i ngaha likabhu pi yi ko. <sup>7</sup> La di-e, anì ahá guo 'ngú pi yi okpála inde ngadje likabhu, anì tsia há di guo 'ngú pi ya. Anì améne ongu bhomu-o li 'kpí li Ngámá gba ní Yesu ayie lie abhulá, anì tsia gó bhú dabilì bini ne oandjelu na angu gba e-o. <sup>8</sup> Anì agó bhú dingidhi djua ngubula na'o 'ngú pi okpála inde i kunda nambila Ebhe de, inde ngayala di naziba Bádha Ngali gba Ngámá gba ní Yesu-o. <sup>9</sup> Makalá na siti 'ngú gba uo-o, adú likabhu na duduma, li bili inde u adú lie de Ngámá Yesu ne Nau na sangu di ne angu gba e tsutsu-o. <sup>10</sup> Engú angoo akódho 'kpí li 'kpí anì agó lie ngubula me ndu okpála gba ni hana inde abhuka ni-e, dhogè ni, amba u toko di ni. Ngayi di-e, yi adú bhú ká okpála bhomu. Padhá de, anga yi abhuka ngali inde ya akpokpo e pi yi-o.

<sup>11</sup> Kaka-a, ya di ngayo Ebhe ndu 'kpí hana ngubula yi me Ebhe gba ní-e mene me yi dhuku li lele maka ani a'i yi lie-o. Ya ngayo ka ani me bhú angu gba ani-e, ani ha angu pi yi ngú namene obabadha kulu inde yi akunda namene e akólo li soso, kabula nabhuka gba yi bhú Yesu-o. <sup>12</sup> Ya la di ngayo Ebhe ngubula me, okpála dhogò 'li Ngámá gba ní Yesu kabula yi, amba u dhogò di yi kabula ani. Bhobhomu-o améne lie ka bádha bhú 'bu inde li 'Dyi ní Ebhe di ne Ngámá gba ní Yesu Kilisito asuno e pi yi-o.

## 2

**Bhulu** Nayala líli gba Ebhe-e agó ngaiza kalanu

<sup>1</sup> Ondaise ya, Ngámá gba ní Yesu Kilisito agó mago, ní tsia pókobhò bhúla ní de ani. Li 'ngú angu-o, ya ngayo ka yi me, <sup>2</sup> bua yi angamba má gala de, 'ndji yi angbingi di-i de. Yi dje ka kpála bini me Bu Bhobua apa pi ni me: «Ekpí nago ka Ngámá akolo», ne me ya apa pi ni mo-o, i du di-e me ya aye bhú balua mo-o, yi azíba de. <sup>3</sup> Kpála bini apíte belegu yi de má kpó! Padhá de, anga kala nago ka Ngámá Yesu-o, agó ngaiza ne nedhinga na kpéke 'ndji li 'ngú gba Ebhe. Pipita-a, li **Bhulu** Nayala líli gba Ebhe-e kóto. Kpála angu-o ngakpata kpadji na djua na duduma. Ebhe andjia engú gba ani-e mandjia. <sup>4</sup> Kpála angu-o ayie bhúlá, ani há 'gú ne Ebhe di ne ndu oehhe koko hana inde li okpála ngau e maka oebhe, inde u nde la di ngadhogò o-o. Ani tsia pá me ni ane ndu uo hana. Ani anú nadu belegu bhú 'ngbé 'ti Ebhe gba omaYuda, ani tsia pá me ni ne Ebhe.

<sup>5</sup> To yi a'íli de me nedhinga ní adu nga bha lie ne yi-e, ma adu apa engú inde-e pi yi uu-o de. <sup>6</sup> Yi mbila la bhadi hana me ehe inde ngani kpadji pi kpála angu-o me ani akóto mbia inde-e de-e ne ni-ie, amba ani koto bha bini

li nedhinga inde li Ebhe a'o e pi ani-o. <sup>7</sup> Padhá de, anga angu inde awo lie mawo gba kpéke 'ndji bhomu-o akpo lita kulu akpo. Engú bini, kpála inde ngani kpadji pi ani-e adú nga bha o-o akólo li nedhinga u a'é ani lie-o.

<sup>8</sup> Abhomu-o, li Bhulu Nayala líli gba Ebhe-e tsia kóto. Ngámá Yesu bhólo ani bha ne mbulu 'wo e, ani tsia ndjía angu ani ne sangu inde ani agó ne e-o. <sup>9</sup> Bhulu Nayala líli ango-o agó bhú angu gba Satana , ani tsia méne ndu djua ongamba 'ngú , ne ndu okiaka 'ngú hana, di ne ongbengbe 'ngú ngú napite okpála. <sup>10</sup> Ani améne ndu djua osisiti 'ngú hana ngubula napite okpála bhende ngakpata kpadji na djua na duduma-o. Ebhe andjía engú gba uo-o mandjia, anga u kunda kukulu 'ngú inde i tí da nako nakobho uo-o de, u tsia bhuka di kukulu 'ngú ango-o de. <sup>11</sup> Kaka-a, Ebhe ató siti mabhundja bhú uo, i tsia píte uo ngubula me u bhuka ongu na eu, <sup>12</sup> amba Ebhe 'o 'ngú pí ndu okpála hana inde i bhuka kukulu 'ngú de-o, inde adu akpi mangbo ndjili li siti 'ngú-o.

*Yi lu* kpekpeke bhú 'bu nabhuka

<sup>13</sup> Ondaise ya inde li Ngámá akunda o, pi ya-a, a ayo me ya gie heni pi Ebhe ndu 'kpí hana li 'ngú gba yi-o. Padhá de, anga Ebhe abhu nani yi nayie li lilita ngubula me yi sia mukobho li kpadji gba Bu Bhobua inde ngamene me yi du bubu, di ne li kpadji na nabhuka inde yi nde ne e bhú kukulu 'ngú-o. <sup>14</sup> Ebhe a'i yi me yi sia mukobho bhomu-o li kpadji na Bádha Ngali inde ya akpokpo e pi yi-o. Ani a'i yi me yi sia di sangu gba Ngámá gba ní Yesu Kilisito-o. <sup>15</sup> Kaka-a, ondaise ya, yi lu kpekpeke bhú 'bu nabhuka gba yi-o. Yi lila kpekpeke ongu inde ya asuno e pi yi nedhinga ya adu lie agba yi di ne bhe ya aye e pi yi bhú balua-o.

16-17 A ayo me Ngámá gba ní Yesu Kilisito ngae makpe di ne 'Dyi ní Ebhe, bedhe bua yi ne masi. A ayo me u ha angu pi yi ngubula me yi du namene ndu 'kpí hana bádha 'ngú, abana i du bhú nagama 'ngú, abana i du bhú namene kulu. Padhá de, anga Ebhe akunda ní, aní aha di kpéke bua na duduma pi ní ka bádha bhú 'bu gba e-o. Aní atsia amene di me ní 'o 'to ní 'to ní na paká paká.

### 3

*Polo apa pi omabhuka me u yo Ebhe ngú ní*

<sup>1</sup> Ngú nabu tata-a, ondaise ya, yi yo Ebhe ngú ya, amba eli gba Ngámá-a yangba má gala, amba okpála inde ngadjedje-e, mene engú inde li eli ango-o ngapa e maka yi ngamemene lie-o. <sup>2</sup> Yi yo di Ebhe me aní kobho ya sakpa osisiti okpála na mbedhembédhe-o. Padhá de, anga a ko de me ndu okpála hana akunda nabhuka Bádha Ngali-e de. <sup>3</sup> Engú bini, Ngámá Yesu ne kpála inde amemene engú maka aní apa lie-o. Aní ahá angu pi yi bhú nabhuka, aní tsia líla yi sakpa Siti. <sup>4</sup> Ya abhuka ne 'li Ngámá Yesu me, engú inde ya ngapa e pi yi-e, yi ngamemene moko, yi améne la bhadi mo-o ne kalanu. <sup>5</sup> A ayo me Ngámá leke bua yi ngú nambila lele maka li Ebhe akunda yi lie, di ne lele maka li Kilisito ngaha kpéke bua pi yi lie bhú nabhuka-o.

*Polo agbele 'dje omabhuka li 'ngú na ipio*

<sup>6</sup> Ondaise ya, ya apa pi yi ne 'li Ngámá gba ní Yesu Kilisito me, yi akpétsə liyi bhú dabilí bini ne ondaise ní na ipio, inde i kpata líli inde ya aha e pi yi de-e de. <sup>7</sup> Padhá de, anga ngayi makpe-e, yi mbila maka a ayo lie me yi kpata lele mukobho gba ya-a ndjindji. Nedhinga ya adu lie agba yi-e, ya du ne ipio de. <sup>8</sup> Ya yo ka kpála bini de me aní ha 'zu pi ya padhá-a de. Engú bini, ya aziba

ndala ne likabhū, ya atsia amene kulu ngbikpì ne sukpe ngú napa me ya adhá bhú kpála bini bhú ká yi de. <sup>9</sup> A ayo nako me ya sia 'he ka yi padhá, engú bini, ya mene nako mo-o de, anga ya akúnda me yi kpata lele mukobho gba ya-o. <sup>10</sup> Nedhinga ya adu lie agba yi-e, ya aha líli inde-e pì yi me: «Lì kpála kúnda namene kulu de-e, a ayo di de me anì zú 'he-e de.»

<sup>11</sup> Ya ngapa mo-o, anga ya adje me okpála koko bhú ká yi ne ipio. U memene kulu de. U bha bini nga'o 'to o lí 'ngú bhe ì tsia o de. <sup>12</sup> Pì okpála bhomu-o, ya ngagbele 'dje uo, ya di ngayo ka uo ne 'lì Ngámá Yesu Kilisito me, a ayo me u mene kulu maka ayo lie, amba u sia ezú inde akoto lí 'kpa o makpe.

<sup>13</sup> La pì yi ondaise ya-a, yi andála lí namene bádha 'ngú de. <sup>14</sup> Lí kpála kpata engú inde ya aye e pì yi bhú balua inde-e de-e, yi de bhele djila yi lí anì. Yi améne 'he bhú dabilì bini ne anì de, ngubula me anì dje numu. <sup>15</sup> Engú bini, yi aú anì maka bhulu yala ka yi de. Yi gbele mangbo 'dje anì maka sùka yi.

*Polo ayo bisagu pì omabhuka na gudhu na Tesalonike*

<sup>16</sup> A ayo me Ngámá na guo 'ngú-o , ha guo 'ngú pì yi ngae makpe ndu 'kpí hana ne bhú ndu 'ngú hana. A ayo me Ngámá du ne ndu yi hana bhú dabilì bini.

<sup>17</sup> Ngama Polo, ma aye engú na soso inde apa me ma yi yi mayi inde-e ne 'kpa ma makpe. A bhomu-o lele nadele 'kpa ma bhú balua gba ma-o.

<sup>18</sup> A ayo me bádha bhú 'bu gba Ngámá gba ní Yesu Kilisito-o du bhú dabilì bini ne ndu yi hana.

## Gandja na Mbia

### Mayogo: Gandja na Mbia (New Testament)

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 14 Jun 2022 from source files dated 25 Mar 2022

6b4904fb-f8ce-5931-8218-7cee8914232c